

Kina kalaaliua – kalaallisut kinaassuseqarnek qanoq paasisarparput, pillugit apeqquteqaat aallaavigalugu oqallinnissamik siunnersuut.

(Naleqqap Inatsisartuni ilaasortaaitai)

Akissuteqaat

(Naalakkersuisut Siulittaasuat)

Naggueqatigiit Inuit silarsuaani paasinnittaaseq malillugu uumassusillit pillugit, soorlu inuit, uumasut naasullu, immikkoortinneqanngillat. Suulluunniit anersaartorsinnaasut toqusinnaasullu inuttut isummerneqartarput; uumasuunersoq, naasuunersoq inuunersorluunniit apeqqutaatinnagu. Tarneq toqujuitsuuvoq uumasuniillu inunnut, immamut, ujaqqanut qaqqanullu ingerlaartarluni. Suussutsitsinnut, inuiaassutsitsinnut suaassutsitsinnulluunniit immikkuualutsitigaanngilagut. Tarnermi ataasiuvoq, taamaallaat timikkut allaassuseqartartoq. Inuunermut paasinnittaasitoqarput imartunerusinnaanngilaq.

Oqallinnissamut siunnersuut kinaassutsimut tunngavoq. Naalakkersuisut kinaassutsimut paasinninnerat tunngaviumik nalogiinnermik, ataatsimooqatigiiffigisamik imaluunniit ataatsimoorfimmik tunngaveqarpoq. Kinaassuseq inunnut ataasiakkaanut, eqimattani inuiaqatigiinnilu pilersinneqartarpoq. Nunap immikkoortuini aamma nunarsurmioqatigiinnermi sunnerneqaatit piupput.. Kinaassuseq allanngorartuuvoq allannguutsit, soorlu inuunermut toqqammaviit avatangiisillu allanngornerannik sunnerneqartartoq. Ullumikkut oqallinneq inuiattut kinaassutsimut tunngavoq.

Naak inuiaqatigiit pisinnaatitaaffii naapertorlugit innuttaasut nammineq aalajangiinissamut pisinnaatinneqartut, taamaattoq tamanit akuerisaasumik inuiaat isumaat nassuiaasiorneqarnikuunngilat.

Namminersorneq pillugu Inatsimmi inuiaat kalaallit nammineq aalajangiinissamut pisinnaatitaaffeqarput, tassanili inuiaat kalaallit kikkussusaat nassuiarneqarani..

Sammissaq siusinnerusukkut oqallisigineqarnikuuvoq. Saammaateqatigiinnissamut Isumalioqatigiissitap isumaliutissiissutaani innuttaasut oqaatigisimavaat kikkut kalaaliunerannik ersarissumik nassuiaasiortoqarnikuunnginnera ajornartorsiutaasoq. Aamma Namminersorneq pillugu Isumalioqatigiissitaq isumaliutissiissummini allappoq: *”inuiattut uagutsitut ittut annertuunik anguniagaqarusuttut ukiumiit ukiumut nunarsuarmi allanngorartumi inuit kikkulluunniit piumassuseqarluartut nunatsinnut atassuteqarnissamik kissaateqartut akornatsinni ilanngutitinneqarnissaat pingaaruteqarluinnarpoq”*

Allatut oqaatigalugu kina kalaaliunerannik kalaallillu kinaassuseqarnerannik nassuiaasiussagutta ajornaatsuinnaanngilaq. Tamatumalli inuianni oqallisigineqarnissaa isummersorfineqarnissaalu Naalakkersuisut tikilluaqqaat.

Inatsit tunngaviususaaq pillugu Isumalioqatigiissitat ilaatigut apeqqutip taassuma qulaajaaviginissaa suliassaraa. Suliakkiummimi ilaatigut atuarneqarsinnaavoq: *”Inuiaat kalaallit suussusii assigiinngitsutigut nassuiaaserneqarsinnaapput. Tamanna pissutigalugu kissaatigineqarpoq, inuiaat kalaallit suussusii pillugit inatsiseqarnikkut kinaassutsimillu pilersitsisuusarnera pillugu, qanoq isummerfigineqassanersoq [isumaliutissiissummi] oqallisigineqaqqaassasoq, Kalaallit Nunaani inuit najugallit tamaasa peqataatillugit.”*

Siunnersuuteqartullu oqallinnissamut siunnersuutaa inaarutaasumik isummerfigineqannginnerani nunatsinni innuttaasut peqataatinneqarnissaat qulakkeertariaqarparput, apeqqut akiuminaatsoq tamatta isiginneriaatsitsinninngaanniit isummerneqarniassammat. Tamatumalu kingorna Isumalioqatigiissitat isumaliutissiissusiaanik suliarinninnermut atatillugu apeqqutip Inatsisartuni suliarineqarnissaa naapertuutissaaq. Inatsisartummi isumalioqatigiissitamut suliakkiussimasartik naammassippat suliassarimmassuk.

Siunissarput kinaassuserpullu oqallisigitillugit pingaaruteqarpoq, Naalagaaffiit Peqatigiit Meeqqanut Isumaqatigiissut naapertorlugu immikkoortortaq 2, 8 aamma 29-mi, meeqqat tamarmik sutigut assigiinngisinneqaratik kinaassutsimik pigiinnarnissaannut ataqqineqarnissaallu pisinnaatitaaffeqarmata. Pisinnaatitaaffeqarneq malitseqarpoq pisussaaffeqarnermik, soorlu inuiaqatigiinni assigiinngisitsinninnissamik aammalu inuit pisinnaatitaaffiisa sulinermi eqqumaffigineqartuarnissaannik.

Naalakkersuisunit pingaartipparput oqallinnerni tamani inuiattut avissarfigisinnaasagut qitiutinngit ataatsimoorfigisinnaasavut nukittorsassagivut. Tamanna inuiaqatigiit kinguaattalu pisariaqartippaat. Oqallinnermilu matumani tamatumap pingaarnertut qitiunissaa pingarpoq.

Siuaasatta imartuumik isiginnittaaseqarnerat tunuliaqutaralugu, Inatsisartunut ilaasortat isumaat tusassallugit Naalakkersuisut qilanaaraat.